

Giuseppi non dormit

Dormint in sa cittadi de Betlemmi
e dormint totus in Gerusalemmi,
pipius e mannus, poburus e riccus,
meris e ischiavus.

A intru 'e sa grutta non dormit Giuseppi:
a Maria càstiat circundada 'e luxi,
pensosu ascutat una melodia
misteriosa.

« O Deus de Abram, de Isaccu e Israeli,
Deus de David rei » àndat pensendi,
« custu misteriu chi si cumprit hoi
deu non cumprendu.

Nau m'has in su sonnu a non timi',
e non lassa' a Maria ca su pipiu
chi depit nasci' e' santu, de s'Altissimu
fillu istimau.

Deu non cumprendu, no isciù poita
a ddi fai 'e babbu a mimi has isceddau,
umili e indignu, poburu fusteri,
e timu e tremu.

Su privilegiu chi m'has riservau,
Onnipotenti Deus, troppu e' gravosu
e is palas mias, su coru e sa menti
reggi' non podint.

Non podint reggi', s'in dogna momentu
non ci ses tui a rinforzai sa fidi,
debili sempri, i a teni' beni abertus
is ogus mius.

E tremu e timu de no essi' bonu
babbu i amorosu po su fillu tuu,
o de pensai d'essi' babbu 'e Deus
e insuperbiri.

O Deus de Abram, de Isaccu e Israeli,
Deus de David rei, mai iscarèschia
chi nudda seu. Sa voluntadi tua
fatta siat sempri. »

In sa grutta unu prantu, a s'improvvisu,
s'intendit e Giuseppi s'ingenuvat:
a su pipiu adorat, de s'Altissimu
fillu istimau.

Sa vida e' bella

« Sa vida » mi naràsta « e' preziosa,
est unu beni 'e bivi' e de gustai
istanti po istanti, interamenti,
ca passat luegu.

De sempri deu » sighiasta « dormu pagu
poita 'ogna momentu in prus a lettu
est tempu' pèrdiu, tempus fuliau
chi prus non torrat. »

Fia piccioccheddu, zia, e t'ascurtau
senza 'e cumprendi' cussu chi naràsta
e, si podìa, a lettu mi stentàu
finas a tardu.

Funt 'e tandu passaus annus i annus
e tui sa vida has biviu intensamenti,
pighendi totu su chi t'hat donau,
nudda lassendi.

Hoi ses a lettu prena de doloris
e non podis nimancu fueddai.

Ma is ogus tuus mi nanta: « Teni a menti:
sa vida e' bella! »

Sighi a marrai

Marra, marra a totu di
cun su soli o siat proendi
e non pensis prus a chi
de sa marra s'e' iscaresciu.
Dd'hat lassada in sa barracca
nendideddi: « A si biri.
Cras a chitzi hap a torrai
po sighiri a marrai. »
De sa di non s'e' pru' biu,
no est torrau a sa barracca :
a su chitzi s'e' fuiu
totu alligru e speranzosu.
S'est 'estiu totu a festa:
sa 'estimenta e sa cravatta;
su dinai nd'hat pigau
chi teniat allogau.
Arribau in sa cittadi
un sennori si creiat
e su mundu interu in manu
giai del tenni' ddi pariat.
« Cussta e' vida! » issu naràda
e 'ogna cosa castiàda
cun is ogus sprappeddaus,
bucca aberta de su spantu:
i' giardinus, i' vialis,
de i buttegas is vetrinas,
is istaris cun is cresias
e i' bellas cidadinas.
Ddi pariat d'essi' sonnendi
e in sa notti andat pensendi:
« Finalmente potzu nai
ca cumenzu 'eu puru a bivi'! »
Ma invecis de sa marra
una crai dd'hant postu in manu
e a chitzi 'ogna mangianu
sindi depit atziai.
« Stringi, stringi a totu di
i' bullonis » dd'hanti nau.
« Custu e' su traballu tuu. »
Issu stringi, ma po chi?
Po su meri chi s'ingrassat,
chi si fait villas a mari,
chi e' bivendi ind'unu stari
dignu de unu pascià.
Ma issu, ch'e' su serbidori,
e' custrettu a si bocchiri,
a si guadangiai su pani
cun su sangui e su sudori.
Marra, marra a totu di

cun su soli o siat proendi
e non pensis prus a chi
hoi sa marra e' disillendi.

S'urtimu basidu

Una lambriga, improvvisamenti,
de is ogus e' ispuntada i, a bellu a bellu,
ateras dd'hant sighia sciundendi is trempas.
M'has imprassau a istrintu e silenziosa
ses abarrada po pagus istantis,
tremendi appena, appena zunchiendi.
Donau m'has unu basidu in su fronti
e, castiendi fissa is ogus mius:
« Custu e' po mama tua » m'hasi nau,
« po filla mia chi prus no hap' a biri.
Saludamidda, imprassamidda a forti,
naraddi ch'in su coru miu dda tengu
e in sa menti, in dogna momentu. »
Sa boxi ti tremiat e tui tremiasta
totu cantu che una folla a su 'entu.
Deu ti castiau e su coru
mi pariat de m'intendi trappassai
de parti in parti de unu 'otteddu.
E, prima 'e ti lassai, t'hapu nau:
« A mama, nonna, dd'has a biri ancora. »
Ma ses istetia profetessa bona
e a filla tua prus non dd'hasi bia,
ca in pagu' mesis t'indi ses andada.
E cussu basidu esti stetiu s'urtimu.